



*Å kunna ta ting på sparket er ein grei eigenskap når ein skal driva for seg sjølv, erfarer Ingebjørg.*

## – Dette ordnar me

**Ho kasta seg uti det med haldninga «dette ordnar me», «dette skal me få til».**  
**PS Bryggekafé i Kråko i Fitjar har sesongopning St Hans. Med seg på laget har Ingebjørg Habbestad Sandvik surdeigen Manfred.**

Ho starta i 2017, langt frå allfarveg, midt i eit hytteområde med nesten 300 hytter.

– Folk kjem til Kråko for å eta bolle, og poenget er ikkje berre den gode smaken av Kråkobolla, men sjølve turen med alle inntrykka på veg hit. Slik folk også dreg til Brandasund for å eta skillingsbolle. Heile pakken.

Bømlokvinna er gift med Erlend Sandvik, dei har Sigrun og Mikal saman, som fyller 3 og 6 år dette året. Dei har busett seg på Skotaberg på Stord, med hane og høner, som også legg Kinderegg

Allereie etter første driftsåret har ho eit lite overskot, jamvel om ho har teke ut litt løn. Bryggekaféen har berre ein fast tilsett, ho sjølv, og baserer drifta på open helgekafé i sommarmånadene, frå St Hans til midten av august. Resten av året er lokala opne for lukka lag og tilstellingar.

– Eg har nok å gjera. Jungeltelegrafan går sin gang, og gjester kjem året rundt for å smaka suppe, eller kråkebollene, brødet og pizzaen som kjem ut av steinommen.



Med god hjelp av Manfred, surdeigen som ho henta i Södertälje for tre år sidan, kan ho laga deilig, sunn og smakfull bakst som har fått mange godord. Slik må det jo bli med ein surdeig som både blir snakka til og klappa på.

Surdeigskursa ho held, er blitt populære. Manfred har dermed avleggjarar rundt om i fleire heimar i Sunnhordland. Med litt mjøl og vatn matar ein deigen, som veks og blir base for nye surdeigsbrød.

Til andre som vurderer å starta med ein matstad, seier Ingebjørg:

– Berre gjer det. Fokuser på enkel og god meny. Lokale varer gjer at ein ikkje treng å ha eit stort varelager.

– Ein blir glad av å spreia matglede. Så lenge eg har det kjekt, kjem eg til å halda fram med dette, seier Ingebjørg Habbestad Sandvik, og svingar seg rundt. Bak henne står ein flokk bankfolk som er på tur i Fitjar og har valt Bryggekaféen



som pitstopp. Men først viser ho dei vegen inn til naboen i same hus, En liten øl. Ølbryggeriet er også ei av nyetableringane i Kråko, og alle sju slaga ELØ bryggjer, er sjølvstøtt å finna i i kaféen hennar Ingebjørg bak glasveggen.

Fakta:

1. Målgruppe: Hyttefolket, båtgjester, bedriftsmarknaden og folk frå regionen
2. Formål: Gje gjesten ei god matoppleving basert på gode, lokale råvarer
3. Etablert i 2017 med ein tilsett og tillkallingshjelp
4. Stad: PS Bryggekafe ligg i Kråko, vest i Fitjar kommune
5. Nettstad/Facebook: [www.ps-bryggekafe.no](http://www.ps-bryggekafe.no)  
Facebook: <https://www.facebook.com/psbryggekafe/>

Publiseringsdato: 21. juni 2018

Tekst/foto: Heidi Eikremsvik



*Bryggekaféen ligg heilt i sjøkanten, vegg i vegg med bryggeriet En liten øl.*